



Komunikado di prensa 2018-044

ENNIA TA KUMPLI KABALMENTE KU SU OBLIGASHONNAN

Willemstad/ Philipsburg – For di e momentu ku a dekretá e areglo di emergensia riba kompanianan di e grupo ENNIA, Banko Sentral di Kòrsou i Sint Maarten (CBCS) ta trahando na restrukturashon di ENNIA. Ta kanando e proseso di restrukturashon na interes di e aseguradoonan di ENNIA tambe. Manera CBCS a informá na algun okashon, ENNIA ta keda kumpli ku su aktividatnan normal durante di e proseso di restrukturashon; aki por pensa riba pago di penshun i daño, tur ta sigui normal.

A base di publikashon resientemente den medionan di komunikashon, den kua ta sugerí ku ENNIA no tin obligashon di kumpli ku su obligashonnan, CBCS ta haña imperativo pa klarifiká esaki.

Ta bèrdat ku den kaso ku un areglo di emergensia ta na vigor, manera den e kaso di ENNIA aktualmente, por suspendé pagonan. Semper CBCS a informá ku e meta di e areglo di emergensia na ENNIA ta pa restablesé solvensia di e kompania. Un parti importante ta keda continuidad di e operashon normal.

Tin un desishon i esei ta ku no ta perhudiká aseguradoonan individual. Siudadanonan di kua nan entrada ta dependé di pagonan di ENNIA, ta sigui haña nan pago normal. Meskos ta konta pa esnan ku tin nan seguro médiko, seguro di kas i outo, pero tambe seguro di riesgo, invalides i morto, ENNIA ta kumpli konforme e akuerdo di kada pólisa.

Tin otro aktividat ku por difikultá e proseso di restrukturashon, pero por posponé eseinan. Un bon ehèmpel ta traspaso, riba petishon, di e balor akumulá di un kontrakt kolektivo di penshun pa un otro proveedó di penshun. Miéntras ku un transferensia ta posponé, ENNIA ta sigui kumpli ku pago di penshun na beneficiarionan den un akuerdo kolektivo di penshun i lo akreditá e rendimentu na e balor akumulá konforme akuerdonan hasí. Ta bon pa splika ku asta den kasonan kaminda no tin un areglo di emergensia na vigor, por ninga un traspaso di balor akumulá, esaki konforme artíkulo 45 insiso 1 di e Landsverordening Toezicht Verzekeringsbedrijf.

Pa posibel preguntanan relashoná ku e informe aki, por tuma kontakto ku CBCS via cbcs@centralbank.cw

Willemstad, 28 di oktober 2018

CENTRALE BANK VAN CURAÇAO EN SINT MAARTEN